

豫章叢書

第三冊

張

華

策

書

第二卷

宋宗伯徐清正公存稿卷六

豐城徐鹿卿撰

頌詩

明堂慶成頌

并序

洪惟聖宋十有四葉皇帝御極之二十二年所以培
高浚深襲休垂鴻以對于神祇祖考者蓋已素矣乃
季秋之月將有事于明堂遠惟成周嚴配之文近稽
皇祐一王之典蔽自聖心奉寧考並配鉅麗偉特混
煌翕赫臣民咸曰休哉先三日列辟造廷奏啟齋宿
有語于門者曰上自朔旦茹蕤止酒矣旣入有衛士

相告曰上親禱于天章閣矣及時將祭冠佩咸集侍班南廡下有閣門老院舉手加額忻然診于衆曰上明禋凡七然景氣澄晏無若今夕可謂與天地合德矣聞者莫不動色相慶臣因伏惟念微之顯忱之不可揜如此皇帝端居法禁一念所發而天地鬼神臨之都民走卒誦之迄禮之成百休昭貺臣於是知流離盜賊不足憂外夷敵國不足平乖氣可消和氣可格特在終始此一心爾臣幸得以職事周旋俎豆間與觀盛典而又叨侍經幄許得以文墨自見謹撰成明堂慶成頌一首凡二十四章章四句冒昧繕寫以

聞雖詞理淺薄不足摹繪日月之光然精意所在亦
微臣拳拳忠愛之義云其詞曰

穆穆聖皇出震乘乾二十二載如日中天大祀有彝
親享凡七嚴父配天昉自今日遠稽前載其在成周
皇皇宗祀奕奕垂休近參家法有若皇祐一祖二宗
於焉並有時維秋季涓吉中辛本以忱敬秩以儀文
皇在原廟推述本始錫慶儲祥仙源演迤皇入太室
裸獻必躬列聖在天時降于宗皇升玉輅齋莊中御
一塵不驚六飛如舞皇登陽館幣玉交陳伍位時序
徧于羣神相維辟公耆俊布列珩璜鏘鳴籩豆豐潔

樂既具奏佾舞工歌八音克諧兩間浹和秋空無滓
萬里一碧璧月珠星瑞光浮溢胥焉低垂非雲非煙
若隆若接郁郁紛紛罔蠲潛通受胙飲福移班紫宸
嵩呼三祝祭澤下流肆眚端門雷雨旣作草木皆春
人曰吾君兼旬蔬食孰知陟降常在帝側人曰吾君
精禱天章孰知明德日薦馨香凡皆可爲天不容僞
眠此休嘉豈其力致一念之善神人具懽朝野傳夸
中外鎮安流民可綏夷狄可滅天且弗違人誰敢越
前星必耀年穀必豐人所同欲天寧弗從俾德周成
儷美仁祖於萬斯年受天之祐若古有訓明命難諶

雖休勿休惟殫厥心我將不作臣竊其義請誦末章
夙夜祇畏

明堂慶成詩

并序

恭惟皇帝陛下自登大寶至于淳祐八年禋祀凡八
方詔旨初下靡日不積忱致欽申飭攸司期以對越
是歲秋仲將有事于明堂而零雨其濛杲日未止上
憂形玉色弗懈益虔先事厯吉祇告原廟起視霽色
澄湛景象清穆旣謁太室衆以燠潤故疑懼旦而玉
輅徐驅揚鑾鏘鳴成禮之夕碧空無雲明月在地儀
節叶度樂舞交奏神靈顧歆內外懽悅上心怡愉下

至奉璋執俎之臣以至三軍萬姓之觀禮望幸者填
溢充塞翕然同辭莫不忻然相告曰丕休哉我皇懿
德純敬上對天心下符人心亨運重開昉自今始將
至于萬萬年無數臣幸得備數法從目擊盛典不勝
踴躍贊歎謹拜手稽首綴成慶成七言長詩一首凡
二十韻仰效歸美之意且以寓箴警之萬一云塵滓
太清臣下情皇懼戰灼之至詩曰

聖皇厯服萬斯年今構精禋第八番配合二儀嚴太
報侑兼三后有常尊純心實德期先盡縟典彝儀匪
謾繁渙祐本因皇祐制民心所欲聖心存季秋肇卜

中辛吉旦氣深憂宿靄昏采月齋居忘肉味寸丹靡
日不天閣倏臨原廟清風穆旣駕鑾輿曉日暎明德
馨香非黍稷眞機軒豁露乾坤高空不夜天澄湛大
樂同和景晏溫福祿穰穰綿帝錫本支奕奕慶文孫
誕敷解澤傳鷄赦環列臣工肅駿奔河海晏清成鉅
典神祇安樂衍璿源無前休美方揚厲持敬工夫重
討論武帝中年愔內慾明皇晚歲異開元願將英斷
充剛健早正皇儲立本根駿骨廣求來冀馬烏巢不
毀集庭鵠長存鯁亮爲元氣痛絕陰柔杜倖門肅正
紀綱強國勢細分臂指鎮侯藩微臣何幸逢熙事奏

雅終篇罄誓言執戟從官今老矣華封祝壽報君恩

五言

湛泉送客二絕句

吾生如寄耳嶺陟又三年政自歸心碎那堪送客船

其二

中年懷易惡更聽斷腸聲多謝兩榕樹逢人管送迎
護法寺勸農呈秘丞

出郭囂塵遠邵農德意宣旌旗清賞地蓂笠嫩晴天
犬吠柴門曉牛肥草徑鮮殷勤觴父老和氣釀豐年

贈曾司戶

君家螺江頭我家劍江邊千載會相望飲水同一川
竭來古梅關相識春風前高義軋層漢清譚響幽泉
努力效往哲勿爲時俗牽

詠蘭

叢蘭抱幽姿結根託山壤所據良孤高其下俯深廣
雲氣接清潤雨露從資養雖然翳深林未肯羣衆莽
輪蹄紛紫陌誰此事幽賞幽賞縱不及香風自來往

酬正錄直學二首

我生慙幽尋訪古梅花邊道原渺無際滄海滙羣川
仰之歎彌高立則參於前爲山始覆簣掘井當及泉

端期會真意可但窺陳編再拜禮雙趺清風生誦絃
其二

劍水望梅關山川接鄰壤前哲餘典刑多士德心廣
曾子重而厚朱張妙存養吳子粹而雅筆耕懲鹵莽
有友五人焉亦足共清賞炯然玉韞櫝持此將安往

酬衆士友 二首

行歌有妙趣聲滿滄浪邊岱嶽宗衆山渤澥傾百川
今人悉闇投無因難至前古人貴漸進有本如原泉
周程不可作三歎撫遺編正音渺難聽蛛絲潤鳴絃

其二

大鵬息天地蚯蚓潔槁壤吾儒苟自適心與天地廣
受之不爲泰鍾鼎備榮養挽之或不留林野歌浪莽
陶詩浪莽林野令譽妙文繡片言榮爵賞物理有乘除大來
斯小往

次曾司戶見貽之韻併餞其行

聞道常苦遲生世何用早洛學此開端文義富論討
高山勞景仰內境幾回照此心同古今一理該衆妙
和黎丞梅關嶺

峭壁接高天閒雲淡橫嶺稍便僧房靜未覺官曹冷
風月兩閒人山川一佳境誰歟共茲樂老仙白垂領

判府羅郎中舉以快閣佳篇輒次嚴韻

此庵湖海士心學富家傳德量擎天柱功名下瀨船
風流今尙爾頭角已嶄然蚤晚分清切輸忠雨露邊

輓陳大庾 二首

前身簡齋老今世令河陽眼底功名小胷中書傳香
清談了公事餘力到詩章鳬履今安在清都待紫皇

其二

一病成疎隔琴堂入見時形癯已非昔客至尙談詩
手墨松烟濕聲歌薤露悲春風誰管領

前賀生梅月
日詩語

重相思

再遊梅關書呈黃幹

雲邊大庾嶺嶺上一叢林送往迎來路升高望遠心
年華今復古人事古猶今惟有關門石相看歲月深

次黃幹梅關韻 二首

老盧行法地千載復抽關崖石橫雙翠禪機漏一斑
兩泉涵定慧半榻臥雲閒着我談風月真成出世間

其二

相逢白蓮社失腳過前溪野興雲橫浦禪心絮着泥
梅花大庾嶺鉢石古招提擾擾仕途夢從前幾箇迷

廬陵試院次陳明叔韻

清江存稿卷六
西風下黃葉客裏上新愁許我聯舟渡從君借箸籌
坐縻三月久寬作兩旬留聚散一場夢邯鄲鼻息鼾
快閣書呈吳宰

千里江章路登臨獨此雄清波長夜月落木又秋風
浪蘆浮花外盟鷗狎鷺中詩魂蘇醒在千載豫章公
丙戌年新春偶成

新年十許日才有一篇詩鄉思風中亂春心雨裏知
病緣衰驟至懶與睡相宜暗想泉溪上杜鵑啼故枝

感興二首

吹竽媚所好乞墦厭其餘邇來效尤者往往拾芥如

其二

浮名恥不榮遺道亦安忍君看趙孟徒千古同一盡

春日

地冷春無力野晴天有功芝蘭傲幽谷蓬藿長東風
政以身爲患非關詩得窮且求吾適意敢擬衆人同

小英石峯

舊作英巖隱今爲庾嶠行雖然一拳許有此數峯青
嶠嶧驚凡目堅剛悖世情墨卿相指似只尺是蓬瀛

送大庾黎丞 二首

老矣黎夫子拳拳只此書萬緣俱淺澹一字不遺餘